

Inatsisartuni Naalakkersuisunilu il. il. ilaasortat aningaasarsiaqartitaanerat il. il. pillugit Inatsisartut inatsisissaattut siunnersuut.

Kapitali 1

Inatsisartuni ilaasortat:

Aningaasarsiat, aningaasartuuteqarnermut tapit, ineqarnermut tunngasut, angalanermi aningaasartuutit ilaquttanillu ingiallorneqartarneq

§ 1. Inatsisartuni ilaasortat akissaatit inissisimaffianni 35-imiittut angeqataannik nalinginnaasumik ukiumut kr. 49.340-inik tunngaviusumik aningaasartalinnik, immikkut tapinik ilasanik, ukiumut aningaasarsiaqartinneqassapput. Aningaasarsiat naatsorsorneqassapput AK-mut isumaqatigiissut ulloq 1. april 2002-mi atuuttoq aallaavigalugu.

Imm. 2. Inatsisartuni ilaasortaq pisortani atorffinnit allanit, atuuffinniluuniit akissarsianik aningaasarsianilluuniit pissarsisarpas, Inatsisartuni ilaasortatut aningaasarsiat, Inatsisartuni ilaasortaanermi aningaasarsiat pisortaneersut atuuffinneersulluuniit ilanngarneqassapput, taamaalilluni pisortani atorffinnit atuuffinnillu katillugit isertitat Inatsisartuni ilaasortaanersiat 1,5-eriaataannit anginerussanatik. § 6, imm. 1-2 naapertorlugu isertitat ilanngunneqassanngillat. Ilaasortap pisortani atorffinnit atuuffinnillu allanit isertitani Inatsisartut Siulittaasoqarfiannut paasisutissiissutigisallugit pisussaavoq. Nalunaarutiginninneq ilaasortap Inatsisartuni ilaasortanngorneranit kingusinnerpaamik ullut 30-it qaangiunneranni, aamma isertitaqarnikkut pissutsit allannguuteqarnerannit kingusinnerpaamik ullut 30-it qaangiunneranni tunniunneqassaaq.

Imm. 3. Inatsisartuni ilaasortatut atuunnermut atatillugu aningaasartuuteqarnermi matussutissanik soraarnerussutisiaqaataasussaannngitsunik ukiumut kr. 50.000-inik tapisiaqartitsisoqassaaq.

Imm. 4. Aningaasarsiat tapisiallu imm. 1 3-milu taaneqartut qaammammumut siumoortumik tunniunneqartassapput. Aningaasarsiat imm. 1-imi taaneqartut iluarsiivigineqartarnerisa AK-mut tunngasumi isumaqatigiinniartarnermi ineriartorneq malittaraat. Imm. 3 malillugu tapisiaq ukiumut ataasiarluni qaammatisiutit malillugit ukiorisap aallartinnerani nunatsinni akinut iluarsiiissut malillugu iluarsiivigineqartassaaq. Imm. 3 malillugu tapisiap iluarsiivigineqarnera siulleq 2004-mi pissaaq.

Imm. 5. Inatsisartuni ilaasortat Nuummi aalajangersimasumik najugaqarnissamik kissaateqartut inissaqartinneqassapput, inissianilu Namminersornerullutik Oqartussat attartortittagaanni ineqarnermut akiliutinik naatsorsuisarnermi maleruagassat qanoq ilisukkulluuniit atuuttut naapertorlugit ineqarnerminnut akiliuteqartinneqassapput. Inatsisartuni ilaasortanut Nuummi najugaqareersunut, Inatsisartunili atuunnerminnik aalussineq pissutigalugu suliffigisaminnik ilinniarnerminnilluuniit unitsitsisut taamaalillutillu atorffinnit atatillugu inigisaminnik ilinniar-tulluuniit ineqarfianni inigisaminnik qimatsisariaqartut pillugit aamma tamanna atuuppoq.

Imm. 6. Inissiat Inatsisartuni ilaasortanut atugassiissutigineqartut Inatsisartuni ilaasortaneq atuukkunnaarpat qimanneqassapput.

Imm. 7. Piffissami ilaasortajunnaarnerisqarfimmi utaqqiisaasumik ineqartitsisoqassaaq. Inissi-ani Namminersornerullutik Oqartussat attartortittagaanni ineqarnermut akiliutit

naatsorsorneqartarnerinut maleruagassat qanoq ilisukkulluunniit atuuttut naapertorlugit ineqarnermut akiliuteqartoqartassaaq. Piffissaq ilaasortaajunnaarnersiaqarfik naappat inigisaq qimanneqassaaq.

§ 2. Inatsisartuni ilaasorta qaammammi siullermi ullormi taassuma aallaqqaataani qinigaanerup akuersissutigineqarfianit aningaasarsiaqartinneqalerlunilu aningaasartuuteqarnermut tapisiaqartinneqalissaaq. Ilaasortap allap toqunera Inatsisartunilunniit ilaasortatut tunuavinnera pissutigalugu ilaasorta qatuutilersimappat, qaammatip toquffiup ilaasortatulluunniit tunuaviffiup aallaqqaataanit aningaasarsiaqartitsisoqalissaaq. Aningaasarsiat aningaasartuuteqarnermullu tapisiat qaammatip Inatsisartuni ilaasortaajunnaarfiup naanerani atuukkunnaassapput.

Imm. 2. Inatsisartuni ilaasorta Kalaallit Nunaanni Inatsisartut Suleriaasianni maleruagassat naapertorlugit ilaasortatut sulinnigiffeqarallarnissamik Inatsisartut Siulittaasoqarfiannit akuersis-suteqarfigineqartoq aningaasarsianik aningaasartuuteqarnermullu tapisianik piffissami sulinnigiffeqarallarimmimi pisinnaangilaq. Inatsisartut Siulittaasoqarfiat sulinnigiffeqarallarallarnernerup akuersissutigineqarnissaanut najoqqutassanik sularinnissaaq. Immikkut ittumik pisuni sin-niisussamik aggersaanerumut atatillugu aningaasartuutit akilerneqarnissaat sulinnigiffeqarallarnermik akuersinissamut tunngavissanngortinneqarsinnaavoq.

Imm. 3. Inatsisartut Siulittaasoqarfiata Inatsisartuni ilaasorta sulinnigiffeqarallarnissamik akuersissuteqarfigippagu piffissami sulinnigiffeqarallarnermi pineqartoq soraarnerussutisiassanik katersissanngilaq. Aamma Inatsisartuni ilaasorta Naalakkersuisuni ilaasortatut atuuffimminik tamakkiisumik aallussiniarnini pissutigalugu sulinnigiffeqarallarnissamik akuersissuteqarfigineqartoq piffissami sulinnigiffeqarallarnermi soraarnerussutisiaqalernissamut katersisinnaangilaq.

Imm. 4. Napparsimaneq qanigisalluunniit toquneranut perululluniluunniit napparsimaneranut atatillugu najuutinnginneq pissuteqavilluni najuutinnginnertut isigineqassaaq.

Imm. 5. Naartunerumut, erninerumut meeravissiartaarnermulluunniit atatillugu sulinnigiffeqarallarneq pissuteqavilluni najuutinnginnertut isigineqassaaq.

§ 3. § 1, imm. 3-mi tapisiat Inatsisartuni ilaasortap Inatsisartuni ilaasortatut atuunnermini aningaasartuutigiunnagaanut matussutissaapput.

Imm. 2. Ilaasortanut Nuummi najugaqanngitsunut Inatsisartut ataatsimiinnerinut atatillugu angalaneq ineqarnerlu kiisalu ullormusiat tjenestemandinut maleruagassat atuuttut malillugit akiliussissutigineqassapput.

Imm. 3. Qinnuteqaateqarneq tunngavigalugu Inatsisartut Siulittaasoqarfiannit Inatsisartulluunniit siulittaasuannit aalajangerneqarsinnaavoq ataatsimiititaliat ataatsimiinnerini ataatsimiititalialluunniit angalanerini peqataanermi angalaneq ineqarnerlu kiisalu ullormusiat maleruagassat tjenestemandinut atuuttut naapertorlugit akiliussissutigineqassasut, kiisalu ullormusiaqartisisoqassalluni.

Imm. 4. Inatsisartuni ilaasortat qaammatisiutit malillugit ukiut tamaasa kr. 30.000-inik killilikkamik Kalaallit Nunaanni paasisassarsiorlutik angalasinnaatitaapput. Inatsisartut Siulittaasoqarfiat angalanissamut pilersaarussiaq tunngavigalugu siuoorutinik tunniussinissamut kiisalu aningaasanut killigititatut taaneqartut iluini akiliutit utertinneqarnissaannut najoqqutassiussaaq. Qaammatisiutit malillugit ukiumi Inatsisartuni ilaasortamut aningaasanut killiliussanit atunngitsuukkat ukiup naanerani atuukkunnaassapput.

Imm. 5. Piffissami Inatsisartunut qinersinissap nalunaarutigineqarnerata qinersinerullu akuersissutigineqarnerata akornanni Inatsisartuni ilaasortat angalaneri, ataatsimiinnerit kinguartinneqarsinnaangitsut pineqarsimanngippata, Landskarsimit akilerneqarsinnaangillat.

§ 4. Ilaasortanut Nuummi najugaqanngitsunut qaammatisiutit malillugit ukiut tamaasa ataasiarluni Inatsisartuni ilaasortap aapparisa Inatsisartut ataatsimiinnerannut atatillugu ingialluinermi angalanermut ineqarnermullu akiliunneqartassaaq.

Imm. 2. Aappariinnermut naligitaassaaq inuit aqqisa allattorsimaffianni najugaqatigiittut nalunaarsorneqarluni ukiumi ataatsimi inooqatigiinneq.

Imm. 3. Ilaasortanut Nuummi najugaqanngitsunut qaammatisiutit malillugit ukiut tamaasa ataasiarluni Inatsisartuni ilaasortap qitornai 18 inorlugit ukiullit angerlarsimaffimmi najugallit Inatsisartut ataatsimiinnerannut atatillugu ingialluinermi angalanermut ineqarnermullu akiliunneqartassapput.

Imm. 4. Inatsisartuni ilaasortaq Naalakkersuisuni ilaasortaajutigippat aapparisa qitornaaluunniit Inatsisartut ataatsimiinnerannut atatillugu ingialluinermi angalanermut ineqarnermullu akiliunneqassanngillat.

Inatsisartuni ilaasortat sinniisussaat:

Aningaasarsiat, aningaasartuuteqarnermut tapit, angalanermi aningaasartuutit ilaqquttanillu ingiallorneqartarnej

§ 5. Inatsisartuni ilaasortat sinniisussaat Inatsisartuni ilaasortamut taartaaffitik ullut tamaasa aningaasarsiat § 1, imm. 1-imi taaneqartut 1/365-erarterutaannik aningaasarsiaqartinneqassapput. Aammattaaq sinniisussaq aningaasartuuteqarnermut tapisianik § 1, imm. 3-miittut 1/365-erarterutaannik tapisiaqartinneqassaaq.

Imm. 2. Aamma sinniisussaq § 3, imm. 2-mi maleruagassaq naapertorlugu angalanermut ineqarnermullu akiliunneqassaaq kiisalu ullormusiaqartinneqassalluni.

Imm. 3. Inatsisartut Siulittaasoqarfiannut qinnuteqarnej tunngavigalugu sinniisussap aapparisa qitornaalu angerlarsimaffimmi najugallit 18-it inorlugit ukiullit, sinniisussallu angajoqqaatut oqartussaaffigisai, Inatsisartut ataatsimiinnerannut, sinniisussap Inatsisartuni ilaasortaq taarserlugu piffissami sapaatip akunnerinit pingasunit sivisunerusumik ataatsimeeqataaffigisaanut ingialluinerminni angalanermut ineqarnermullu akiliunneqarsinnaapput. § 4, imm. 2 aamma taamatut atuutissaaq.

Kapitali 2

Inatsisartut siulittaasuat, Naalakkersuisut siulittaasuat Naalakkersuisunilu ilaasortat: Aningaasarsiat, ineqarnermut tunngasut, ilassinninnermut aningaasartuutit, angalanermi aningaasartuutit ilaqquttanillu ingiallorneqartarnej

§ 6. Inatsisartut siulittaasuat, Naalakkersuisut siulittaasuat Naalakkersuisunilu ilaasortat aningaasarsiat § 1, imm. 1-imi taaneqartut saniatigut akissaatit inissisimaffianni 39-imiittut, nalinginnaasumik tapisiaqartinneqartut, angeqataannik ukiumut aningaasarsiaqartinneqassapput. Aningaasarsiat naatsorsorneqassapput AS - G-mut isumaqatigiissut ulloq 1. april 2002-mi atuuttoq aallaavigalugu.

Imm. 2. Inatsisartut siulittaasuannut Naalakkersuisullu siulittaasuannut kr. 120.930-nik immikkut tapisiaqartitsisoqassaaq.

Imm. 3. Naalakkersuini ilaasortanut Inatsisartuni ilaasortaannngitsunut Inatsisartuni ilaasortat aningaasarsiaasa § 1, imm. 1-imi taaneqartut angeqataannik tapisiaqartitsisoqassaaq.

Imm. 4. Inatsisartut siulittaasuut, Naalakkersuisut siulittaasuut Naalakkersuisunilu ilaasortat qaammatip qinigaaffimmik aallaqqaataanit qaammatip taamatut atuukkunnaarfimmik naanissaata tungaanut aningaasarsiaqartinneqassapput. Aningaasarsiat qaammammut siumoortumik tunniunneqassapput. Imm. 1 – 3-mi taaneqartutut aningaasarsiat tapisiallu iluarsiivigineqartarnerisa AS – G-mi isumaqatigiinniuteqartarfimmi ineriartorneq malittaraat.

Imm. 5. Inatsisartut siulittaasuut Naalakkersuisullu siulittaasuut akeqanngitsumik ineqartinneqassapput. Naalakkersuisuni ilaasortat sinnerinut atorfimmuut atasumik ineqartitsisoqassaaq, taakkununanilu inissiani Namminersornerullutik Oqartussat atorfimmuut atasumik pinngitsoorani inigisassatut inigitittagaanni ineqarnermut akiliutinik naatsorsuisarnermi maleruagassat qanoq ilisukkulluunniit atuuttut naapertorlugit ineqarnermut akiliuteqartitsisoqassalluni.

Imm. 6. Inatsisartut siulittaasuut Naalakkersuisullu siulittaasuut Inatsisartut siulittaasuattut Naalakkersuisullu siulittaasuattut atuukkunnaarunik akeqanngitsumik inigisaminnit nuussapput. Inigisat Naalakkersuisuni ilaasortat sinnerinut inigitinneqartut Naalakkersuisuni ilaasortaajunnaarnermi qimanneqassapput.

Imm. 7. Piffissami ilaasortaajunnaarnerisiaqarfimmi utaqqiisaasumik ineqartitsisoqassaaq. Inissianut Namminersornerullutik Oqartussat attartortittagaannut ineqarnermut akiliutit naatsorsorneqartarnerinut maleruagassat qanoq ilisukkulluunniit atuuttut naapertorlugit ineqarnermut akiliuteqartitsisoqartassaaq. Piffissaq ilaasortaajunnaarnerisiaqarfik naappat inigisaq qimanneqassaaq.

§ 7. Inatsisartut siulittaasuut, Naalakkersuisut siulittaasuut Naalakkersuisunilu ilaasortat Landskarsip akiligaanik ilassininnermi aningaasartuuteqarsinnaatitaapput.

§ 8. Inatsisartut siulittaasuata, Naalakkersuisut siulittaasuata Naalakkersuisunilu ilaasortat Inatsisartut siulittaasuattut, Naalakkersuisut siulittaasuattut Naalakkersuisunilu ilaasortatut angalaneri Landskarsimit akilerneqassapput.

Imm. 2. Nerisaqarnermut ineqarnermullu aningaasartuutit kingusinnerusukkut Landskarsimit akilerneqartussanngorlugit akiligassaq malillugu matussuserneqartassapput.

Imm. 3. Immikkut pissutissaqartillugu Inatsisartut siulittaasuata, Naalakkersuisut siulittaasuata Naalakkersuisunilu ilaasortat Inatsisartut siulittaasuattut, Naalakkersuisut siulittaasuattut Naalakkersuisunilu ilaasortatut suliaminnut atatillugu angalaneranni apparisat inooqatigisalluunniit angalaqatigineqarsinnaapput. § 8, imm. 2 aamma taamatut atuutissaaq.

Imm. 4. Naalakkersuisuni ilaasortap apparisaanut Nuup avataani illoqarfigisaminiiginnarniarluni aalajangertumut qaammatisiutit malillugit ukiut tamaasa marloriarluni Nuummumut angalanermut akiliussisoqartassaaq. § 4, imm. 2 aamma taamatut atuutissaaq.

Imm. 5. Aammattaaq Naalakkersuisuni ilaasortap qitornaanut 18-it inorlugit ukiulinnut Nuup avataani angerlarsimaffimmi najugalinnut qaammatisiutit malillugit ukiut tamaasa marloriarluni Nuummumut angalanermut akiliussisoqartassaaq.

Kapitali 3

Inatsisartut siulittaasuata, Naalakkersuisut siulittaasuata Naalakkersuisunilu ilaasortat allanik atuuffeqarsinnaaneri

§ 9. Inatsisartut siulittaasuut, Naalakkersuisut siulittaasuut Naalakkersuisuniluunniit ilaasortaq ivertinneqarnermi nalaani allanik atuuffeqartoq taakkunanga tunuassaaq.

Imm. 2. Inatsisartut siulittaasuata, Naalakkersuisut siulittaasuata Naalakkersuisuniluunniit ilaasortap atuuffiit taakku ingerlatiinnarumallugit kissaatigippagu Qinersinerup Misilinneqarnissaanut Ataatsimiititaliaq tamanna pillugu erngerluni nalunaarfiggissavaa. Nalunaarutip tigneraniit sapaatip akunneri pingasut qaangiutinnginnerini pineqartup atuuffimminik taamaattunik ingerlatsiinnarnissaa ataatsimiititaliap itigartitsissutigisinnaavaa.

Imm. 3. Inatsisartut siulittaasuata imm. 2-mi piffissaliussap naanerata kingorna atuuffiit sorliit ingerlatiinnarnissaannut siulittaasup akuerineqarnera Inatsisartunut nalunaarutigissavaa. Naalakkersuisut siulittaasuata, Naalakkersuisut siulittaasuata Naalakkersuisunilu ilaasortat atuuffiit sorliit ingerlatiinnarnissaannut akuerineqarnerisut Inatsisartut siulittaasuannut nalunaarutigissavaa.

Imm. 4. Inatsisartut siulittaasuata, Naalakkersuisut siulittaasuata Naalakkersuisunilu ilaasortat atuuffinnik pineqartunik ingerlatsinermik saniatigut atuuffinnik nutaanik Qinersinerup Misilinneqarnissaanut Ataatsimiititaliaq akuersereersimatinnagu tiguseqqusaanngillat.

Kapitali 4

Ilaasortaajunnaarnersiat

§ 10. Inatsisartuni Naalakkersuisuniluunniit ilaasortatut atuuffimmit tunuarnermi pineqartup § 1, imm. 1 - 2-mi kiisalu § 6, imm. 1- 3-mi qaammammut isertittagaasa angeqataannik ilaasortaajunnaarnersiaqartitsisoqassaaq.

Imm. 2. Pineqartup katillugu piffissami atuuffigisimasaani ukiup atuuffiup aallartinneri tamaasa qaammatip aappaa qeqqanut naatsorsuullugit ilaasortaajunnaarnersiat tunniunneqartassapput.

Imm. 3. Naalakkersuisuni ilaasortatut tunuarnermi piffissaq Naalakkersuisutut atuuffigisimasaq tunngavigalugu ilaasortaajunnaarnersiaqartitsisoqassaaq.

Imm. 4. Inatsisartuni ilaasortatut tunuarnermi piffissaq Inatsisartuni ilaasortatut atuuffigisimasaq tunngavigalugu ilaasortaajunnaarnersiaqartitsisoqassaaq.

Imm. 5. Imm. 1 malillugu ilaasortaajunnaarnersiat sivikinnerpaamik qaammatinut pingasunut sivilunerpaamillu qaammatinut aqqaneq marlunnet, qaammammut siumoortumik, tunniunneqassapput.

Imm. 6. Inatsisartuni sinniisussaq, piffissami sivilussusissaa aalajangigaanngitsumi Inatsisartuni ilaasortap atuuffianiilersoq, piffissap atuuffiup naanerani ilaasortaajunnaarnersianik, § 5, imm. 1, oqaaseqatigiit suilliit malillugit, pineqartup ullormut aningaasarsiarisartagaasa angeqataannik aningaasartalimmik tunineqassaaq. Sinniisussap piffissami sivilussusissaa aalajangigaanngitsumi Inatsisartuni ilaasortamut taartaaffigisimasaanut ilaasortaajunnaarnersiat tuniunneqassapput. Ilaasortaajunnaarnersiat pineqartup ullut arfineq-pingasukkaarlugit atuuffigisaanut ullormut ataatsimut naatsorsuullugit tunniunneqassapput. Ilaasortaajunnaarnersiat qaammammut siumoortumik tunniunneqassapput.

Imm. 7. Ilaasortaajunnaarnersianik tunniussisoqareersimatillugu atuuffimmut pineqartumut ilaasortaajunnaarnersiaqarsinnaaneq sivikillineqassaaq. Ilaasortaajunnaarnersiat anginerpaaffissaannik tunniussisoqarsimappat atuuffimmut pineqartumut ilaasortaajunnaarnersiaqarsinnaaneq aningaasartaarutsinneqassaaq.

Imm. 8. Inatsisartuni sinniisussatut atuuffimmut ilaasortaajunnaarnersianik aamma Inatsisartuni ilaasortatut Inatsisartuniluunniit sinniisussatut atuuffimmut aningaasarsianik ataatsikkut tigusaqartoqarsinnaanngilaq, aamma atuuffinnut taakkununga marlunnet ilaasortaajunnaarnersiummik ataasiinnarmik tunniussisoqarsinnaavoq.

Ilaasortaajunnaarnersiaqarnissaaq atuuffinni piffissaq atuuffiisoq tamakkerlugu tunngavigalugu naatsorsorneqassaaq. Ilaasortaajunnaarnersiaq atuuffinni arlalinni piffissaq atuuffigisimasaq ataaseq

tunngavigalugu tunniunneqartoq sivisunerpaamik qaammatinut 12-inut tunniunneqarsinnaavoq. *Imm. 9.* Inatsisartut siulittaasuata Naalakkersuisuni ilaasortanut maleruagassat atuuttut naapertorlugit ilaasortaajunnaarnersiaqassaaq. Inatsisartut siulittaasuattut aamma Naalakkersuisuni ilaasortatut atuuffinnut ilaasortaajunnaarnersiuutinik aningaasarsianillu ataatsikkut pisoqarsinnaan-ngilaq, aamma atuuffinnut taakkununnga marlunnet ilaasortaajunnaarnersianik ataasiinnarmik tunniussisoqarsinnaavoq. Atuuffinni piffissaq ataatsimut atuuffiusoq tunngavigalugu ilaasortaajunnaarnersiaqarsinnaaneq naatsorsorneqassaaq.

Kapitali 5

Aapparisaq qitornallu aningaasarsiaqartitaaneri ilaasortaajunnaarnersiaqartitaanerilu

§ 11. Inatsisartut siulittaasuata, Naalakkersuisut siulittaasuata, Naalakkersuisuni ilaasortap Inatsisartuniluunniit ilaasortap taamatut atuutsilluni toqusup aapparisaq qaammatini pingasuni aningaasarsianik tiguisinnaatitaavoq. Qaammammut aningaasarsiat Inatsisartut siulittaasuata, Naalakkersuisut siulittaasuata, Naalakkersuisuni ilaasortap Inatsisartuniluunniit ilaasortap § 1, imm. 1 - 2 kiisalu § 6, imm. 1 - 3 naapertorlugit qaammammut isertittagaasa angeqatigaat. *Imm. 2.* Pineqartoq ilaasortaajunnaarnersianik tigusartagaqarsimappat piffissap ilaasortaajunnaarnersiaqarfiup sinnerani aapparisaq ilaasortaajunnaarnersianik tiguisinnaatitaavoq. Aapparisarli sivisunerpaamik qaammatini pingasuni ilaasortaajunnaarnersianik tiguisinnaatitaavoq. *Imm. 3.* Inatsisartut siulittaasuata, Naalakkersuisut siulittaasuata, Naalakkersuisuni ilaasortaap Inatsisartuniluunniit ilaasortaap aapparisaq qimataqanngippat, aapparisarluunniit qimataasoq pineqartup aningaasarsianik ilaasortaajunnaarnersianilluunniit tiguisinnaatitaaffigisaani qaammatit pingasut qaangiutinngitsut toquppat, qitornat 18 inorlugit ukiullit, ilaasortaajunnaarnersiuutinik tiguisinnaatitaasup toqunerani pineqartumit angajoqqaatut oqartussaaffigineqarpata, taakku aningaasarsiaqarsianik tiguisinnaatitaalerlutillu ilaasortaajunnaarnersianik tiguisinnaatitaallissapput.

Kapitali 6

Soraarnerussutisiat

§ 12. Landsrådimi, Inatsisartuni Naalakkersuisunilu ilaasortaasimasunut taakkulu aapparisaannut §§-ini 13 – 16 maleruagassat malillugit soraarnerussutisiaqartitsisoqassaaq.

§ 13. Soraarnerussutisiaqarsinnaanermut tunngavigineqassaaq pineqartup Naalakkersuisuni ilaasortatut piffissami ataatsimi arlalinnilluunniit katillugit sivikinnerpaamik ukiumik ataatsimik sivisussusilimmik ingerlatsisimanissaa, Inatsisartuniluunniit ilaasortatut piffissami ataatsimi arlalinniluunniit, katillugit sivikinnerpaamik ukiumik ataatsimik sivisussusilimmik ingerlatsisimanissaa.

Imm. 2. Pineqartoq 60-inik ukioqalersimappat, atuuffimmut aningaasarsianik ilaasortaajunnaarnersianilluunniit qaammatit tunniussiviup naanerani soraarnerussutisianik tunniussisoqassaaq, taamaattoqanngippallu ukiut taakku anguneqarnerisa kingorna qaammatit ulluisa siulliannit.

Imm. 3. Ilaasortaap soraarnerussutisiaqarfigisaminut nutaamik

atuuteqqilersoq, piffissami, aningaasarsianik ilaasortaajunnaarnersianilluunniit tunniussiviusumi soraarnerussutisiaqassanngilaq.

§ 14. Inatsisartuni ilaasortat soraarnerussutisiaasa ukiut atuuffiit aallartinneri tamaasa naatsorsuutigalugit atorfilittut atorfimmi akissaatit inissisimaffianni 31, skalatrin 44-mi soraarnerussutisiat qaffasinnerpaaffiattut anguneqartup 1/20-erai. Soraarnerussutisiat qaffasinnerpaaffissaat ukiut 20-it atuutereernermi anguneqassaaq.

§ 15. Inatsisartut siulittaasuata, Naalakkersuisut siulittaasuata Naalakkersuisunilu ilaasortat soraarnerussutisiaat ukiut atuuffigisat aallartinneri tamaasa soraarnerussutisiat, atorfilittut atorfimmi akissaatit inissisimaffianni 39, skalatrin 52-mit soraarnerussutisiat, tamanut atuuttumik tapisiat ilanngunnagit, soraarnerussutisiat qaffasinnerpaaffiattut anguneqartup 1/20-erai. Soraarnerussutisiat qaffasinnerpaaffissaat ukiut 20-it atuutereernermi anguneqassaaq.

§ 16. Apparisaamut qitornanullu soraarnerussutisiat maleruagassat tjenestemandinut atuuttut naapertorlugit tunniunneqassapput.

Imm. 2. §§-it 14, 15 aamma 16 imm. 1, malillugit soraarnerussutisiat maleruagassat tjenestemandinut atuuttut naapertorlugit iluarsivigineqartassapput.

Imm. 3. Inatsisartut inatsisaanni taaneqartutut atuuffiit ilaannit ataatsimit ulloq 1. januar 2004 nallertinnagu inuk tunuarsimappat, atuuffimmullu tassunga atuuffinnilluunniit taakku ilaannut arlalinnut soraarnerussutisianik katersukkanik soraarnerussutisiaqarsinnaatitaappat soraarnerussutisiaqarpalluunniit, soraarnerussutisiat katillugit tunniunneqartut § 15, imm. 1 malillugu soraarnerussutisiarineqarsinnaasut qaffasinnerpaaffiattut taamaallaat angissuseqarsinnaapput.

Imm. 4. Inatsisartut inatsisaanni taaneqartunit atuuffimmit atuuffinnilluunniit arlalinnit inuk soraarnerussutisiaqartoq, ullorlu 1. januar 2004 nallertinnagu atuuffimmit tunuarsimasoq, pisortani atorfimmit allamit aningaasarsiaqarsinnaatitaappat, akissarsiaqarsinnaatitaappat soraarnerussutisiaqarsinnaatitaappalluunniit, Inatsisartut inatsisaat una malillugu soraarnerussutisiat ilanngarneqassapput, taamaalilluni aningaasarsiat, akissarsiat soraarnerussutisiallu katillutik § 15, imm. 1 malillugu soraarnerussutisiarineqarsinnaasut qaffasinnerpaaffiattut taamaallaat angissuseqarsinnaanngorlugit.

Imm. 5. Inatsisartuni Naalakkersuisuniluunniit siusinnerusukkut ilaasortaasimasoq ulloq 1. januar 2004 nallertinnagu Inatsisartuni Naalakkersuisuniluunniit ilaasortatut atuuffimmit tunuarsimappat, kingusinnerusukkullu Inatsisartunut Naalakkersuisunulluunniit qinigaappat, imm. 3 aamma imm. 4 atorneqassanngillat.

§ 17. Inatsisartut inatsisaata atortuulersinneqarnerani Inatsisartuni Naalakkersuisunilu ilaasortanut, aningaasarsiat il.il. pillugit Inatsisartut inatsisaat nr. 11 28. oktober 1993-imeersoq aamma Inatsisartuni Naalakkersuisunilu il.il. ilaasortatut aningaasarsiaqartitaanerat il.il. pillugit Inatsisartut inatsisaat nr. 17 7. december 2001-imeersoq naapertorlugit soraarnerussutianik aqqissuussinerit ulloq 31. december 2003 killigalugu katersukkatut inissinneqassapput.

Imm. 2. Inatsisartut inatsisaata atuutilerfianit atuutilersumik soraarnerussutisiaqarnermut aqqissuussinermik inunnut ataasiakkaanut naatsorsuussamik soraarnerussutisiaqarfimmi Kalaallit nunaanniitumi Inatsisartuni Naalakkersuisunilu ilaasortanut ingerlaavartumik tunniussisarfimmik pilersitsisoqassaaq. Soraarnerussutisiaqarnermik aqqissuussivimmu ilaatinneqassapput utoqqalinermi soraarnerussutisiat, apparisap qitornallu soraarnerussutisiaat.

Imm. 3. Imm. 2-mi soraarnerussutisiaqarnermik aqqissuussinermut taaneqartumut Inatsisartuni Naalakkersuisuniluunniit ilaasortap ataatsip aningaasarsiaasa 10%-iinik ingerlaavartumik

tunniussisoqartassaaq. Aammattaaq Inatsisartuni Naalakkersuisuniluunnit ilaasortap ataatsip aningaasarsiaasa 5%-iinik ingerlaavartumik ilanngaassuisoqartassaaq. Aningaasat ilanngaatigineqartartut tassaapput Inatsisartuni Naalakkersuisuniluunniit ilaasortap soraarnerussutisiaqarnermik aaqquissuussinermut imm. 2-mi taaneqartumut nammineerluni akiliutai.

Kapitali 7

Inatsisartuni ilaasortaangitsut ataatsimiititaliani, neynini, sinniisoqarfinni taamaaqataannilu peqataaneri

§ 18. Inatsisartuni ilaasortaangitsunut ataatsimiititaliani, neynini sinniisoqarfinnilu Namminersornerullutik Oqartussat sinnerlugit atuuffimmik isumaginnittunut ullormut ataatsimut aningaasarsianik § 1, imm. 1-imi taaneqartut 1/365-erarterutaannik aningaasarsiaqartitsisoqassaaq. Aammattaaq najugarisaq qimallugu ataatsimiinnermut peqataanermi angalanermut ineqarnermullu akiliussisoqassaaq kiisalu ullormusianik maleruagassat tjenestemandinut atuuttut naapertorlugit tunniussisoqartassaaq.

Imm. 2. Inatsisartuni ilaasortaangitsunut ataatsimiititaliani, neynini sinniisoqarfinnilu imm. 1-imi taaneqartuni immikkut annertuumik suliassaqarfiusumik siulittaasuuffimmik atuuffilinnut tapisianik Naalakkersuisut aalajangersaasinnaapput. Tapisiat qaammammoortumik siumoortumik tunniunneqartassapput, tunniunneqartarunnaassallutillu siulittaasuuneup atuukkunnaarneranit qaammatip naanerani, Naalakkersuisulluunniit atuukkunnaartitsinissamik aalajangiippata.

Kapitali 8

Piginnaatitsissut

§ 19. Inatsisartut Siulittaasoqarfiat Naalakkersuisut isumaqatiginiareerlugit Inatsisartut inatsisaat una naapertorlugu maleruagassanik erseqqinnerusunik aalajangersaasinnaavoq.

Kapitali 9

Pinerluttulerinermut inatsimmi pineqaatissiinerit

§ 20. § 1, imm. 2-mi, oqaaseqatigiinnik 2, 3 - 4-nik unioqqutitsineq Kalaallit Nunaanni pinerluttulerinermik inatsimmi aalajangersakkat malillugit pineqaatissiissutaasinnaavoq.

Kapitali 10

Atortuulersitsineq il. il.

§ 21. Inatsit una ulloq 1. januar 2004-imi atortuulissaaq.

Imm. 2. Tamatuma peqatigisaanik Inatsisartut inatsisaat nr. 11 ulloq 28. oktober 1993-imeersoq Inatsisartunut, Naalakkersuisunut il. il. ilaasortat aningaasarsiaqartitaanerat il.il. kiisalu Landsrådimut, Inatsisartunut, Naalakkersuisunut il. il. ilaasortaasimasut

soraarnerussutisiaqartinneqarnerat pillugu inatsit aamma Inatsisartut inatsisaat nr. 17 ulloq 7. december 2001-imeersoq Inatsisartunut Naalakkersunullu il. il. ilaasortat aningaasarsiaqartitaanerat il. il. pillugit inatsit atorunnaarsinneqarput.

Imm. 3. Taamaattorli Kalaallit Nunaata Landsråðianut aamma Kalaallit Nunaata Landstingianut sivisuumik ilaasortaasimasunut soraarnerussutisiaqartitsinermik aaqqissuussineq pillugu Landstingip inatsisaani nr. 3-mi ulloq 16. maj 1979-imeersumi ("Ataqqinaammik tunissutisitsisarneq pillugu inatsit") aamma Landsstyremut il. il. ilaasortaasimasunut soraarnerussutisiaqartitsineq pillugu landstingip inatsisaani nr. 7-imi ulloq 14. juli 1982-imeersumi maannakkut tunniuttakkat piginnaatitaaffiillu maannamutut angissuseqarlutik, malerugassallu maannamut atuuttut malillugit, aalajangersakkat taakku malillugit piginnaatitaaffiit taakku atuukkunaarnissaasa tungaanut, tunniunneqassapput.

Namminersornerullutik Oqartussat, ulloq xx. yy 2003

Hans Enoksen

/

Kaj Kleist